



平閩紀卷之八目錄

咨文

咨訂師期咨同安鎮

懇恩再培咨漳浦鎮

月米分給咨督院

會師搗巢咨水提

咨會出兵咨漳

州鎮

緊急軍務咨督院

剿殺海逆咨督院

會師擣巢咨水提

咨會遣發咨督院

再商保固咨兩院

咨明事咨督院

飭勦內地咨五鎮

咨取功員咨五鎮

借給糧餉咨撫院

飛報事咨督院

謹陳平海咨督院

咨商事咨督院

平閩紀卷之八

懋紹漁山

三韓楊

捷元凱著

男懋緒令鴻纂

懋綸今掌

咨訂師期咨同安鎮

為咨訂師期事本月初七日准 水師提督萬 咨

開為照海賊船隻厚集海壇所有進取機宜業經咨

商詳晰矣本月初一日准貴將軍咨覆本提督內開

除即一面咨會 督部院調撥仍酌妥主稟具

題一面移咨 同安鎮就於鎮標三營之內多撥精健
兵丁擡運發煩火炮着令能將率領前赴圍頭地方
屯營并飛檄防守東石靈水竿頭副叅遊郭奇韓元
朗焦國巡劉國興丁世芳等務與同安官兵相爲犄
角互相聲援相機堵截攻擊逆艘併行長樂福清興
化惠安洛陽泉州各將領嚴令親自多帶官兵各於
沿海所轄地方巡哨堵截以壯我兵聲勢各去後本
將軍惟有竚候好音即便親統官兵進搗海澄共殲
積寇也合就咨覆等因准此本提督細繹大咨具見
貴將軍調遣周詳精誠爲

國同舟誼切深爲厚幸今本提督的於本月初四日由
定海出師分兵夾攻務期制勝但圍頭乃賊艘上下
寄泊之灣所關最爲要緊須寔得精銳陸兵先據其
地安設砲火堵截攻擊非與他灣虛張聲援者可比
茲屆師期合再咨訂爲此合咨貴將軍請煩察照迅
調施行等因到本將軍准此案照先准 水師提督
萬 咨開撥發精兵先於圍頭分佈截擊上下逆艘
等因業經本將軍移咨 貴鎮於鎮標三營之內挑

選精兵着令能將帶領擡運發煩火砲前赴圍頭附近處所屯札會合東石竿頭各防將相為犄角聲援候示進據圍頭要口相機夾擊并經咨會 總督部院及咨覆水師提督各去後今准咨訂師期前來合再移催為此合咨 貴鎮煩為查照希即立刻於鎮標三營之內多選精健兵丁并多帶砲火着令勇敢將弁帶領星夜馳赴東石會合靈水竿頭各防將挑選精兵多帶砲火合營進據圍頭要口相機攻擊逆艘不許上下灣泊游移事關緊急軍機希勿少緩若恐同安留守兵單 撫部院刻期將到另為商酌調遣分布可也併將撥過官兵姓名數目日期迅覆查考施行

康熙十九年二月初八日

懇恩再培咨漳浦鎮

為懇恩再培縣脉樹德官民事據漳浦縣鄉紳林琛
 黃性震陳天達舉人藍陳畧陳炳林登虎生員黃台
 佐蔡邁廣丘士錚里民郭春洪正等僉呈稱浦邑自
 昔人文甲上郡丁糧冠十城良以梁峯拱秀吉水朝
 宗自赤檜中流由雙溪而遶衛縣治以護城隍地利
 居於全盛也至戊子年洪水崩陷溪港多岐赤檜雙
 溪水違故道本邑由是丁糧日減文物衰替幸將軍
 大老爺前任駐節浦邑檄發梅林保人民鳩眾召工

修築河堤官民利賴茲數年以來水濫雙溪堤開四
潰士民咸受其害今欲使吉水仍朝本縣費用浩繁
別召工匠又多生疎難以計日報竣伏惟將軍大老
爺恩施浦邑雞犬桑麻蒙休者數萬戶春秋俎豆戴
德者數十年今值節鉞再臨之日乃恩波復造之時
彈壓全省獨切一方琛等相率匍呈叩乞痾瘵舊治
始終栽植查照往例仍着附近梅林保人民自備芒
找木料工匠竭力堅築以一保而培一縣之地脉相
應暫免該保徭役一年以均勞逸伏乞行縣示准起

工庶彫殘可起富盛可期合邑士民咸荷慈恩於無
既矣等情到本將軍據此爲照漳浦城外赤檜雙溪
之水實爲該縣治之脉絡向因亂後隄防崩潰水不
朝護城郭而閭閻日敝人文之氣中衰本將軍於順
治年間援勦入閩駐節該邑此時城垣倒塌里巷丘
墟本將軍相度城垣舊址檄行有司庀材修築不數
月而工竣人民復集因詢及紳衿耆老知水脉枯涸
乃倡議修導而該縣之戶口丁糧人文甲第幾復其
舊經今二十四載矣年來海逆播亂水隄再決茲據

紳士里民僉呈重修猶恐工程浩大請暫免梅林保
徭役一年俾該保人民就近自備工料修築以固河
隄以通水脉等情前來除檄行漳浦縣酌免修砌外
諒貴鎮建牙茲土凡係裨益地方事務未有不舉行
恐後者是本將軍經營於前貴鎮修復於後總期大
有造於該邑也今據前情相應咨達爲此合咨貴鎮
煩爲查照希卽就近面諭漳浦縣作速酌議修砌以
復水道以阜民物施行

康熙十九年二月十二日

月米分給咨督院

爲月米分給本折標兵獨歎偏枯籲請一視同仁以
均戍苦以恤兵饑事據前營遊擊焦國巡守備丁世

芳呈稱案奉本將軍憲票准

總督部院姚
巡撫部院吳

咨開

前事等因各到本將軍准此案照先據該將呈請咨
明駐防東石各營官兵應給本折月米通融發散以
均苦樂等情業經本將軍咨商督撫兩院檄府勻給去
後今准前因除將原文抄粘外合行遵照備票仰職
卽便移知各營嗣後駐防東石官兵應支月米遵將

本折通勻給散以均苦樂毋違等因計粘抄一紙奉
此該卑職國巡隨卽移會泉州府及移知各營遵照
外仍會同屢催均勻給發并着令千總周葵田琦守
催去後茲據周葵田琦同稟稱葵等日赴泉州府坐
催正月分糧米詎蔣知府屢以通行廳縣均派運給
爲辭迨至本月初一日方稱正月分糧米本標在汛
未有攤勻應照舊米折若要均勻必俟二月分方得
勻給今米價亦且未有暫候設處其正月分餉銀必
俟協餉解到方得發給似此推延汛兵枵腹難待稟
乞轉詳本將軍檄催速給以濟兵飢等情據此竊照
泉汛米價湧騰窮兵借貸無門買糴莫措忍飢待斃
幸蒙本將軍軫念汛兵艱苦恩賜本折均勻各兵踴
躍歡呼感激無地但自奉憲行以來日望糧米不啻
雲霓之切屢催泉州府日久未經運給刻下征勦大
舉汛兵乏食何以責其荷戈用命合無懇請本將軍
檄行泉州府迅將本標防守東石兵丁正月分糧米
撥運到汛以濟兵糈庶三軍得藉飽騰而邊疆永固
矣等情到本將軍據此案照先據該將等僉呈駐防

東石各汛本標官兵應支月米請與各營本折通勻散給以均苦樂等情業經本將軍咨准 貴部院覆准檄府勻給在案際茲青黃不接之候米價騰貴窮兵懸釜待炊據稱該府推諉不給刻下水陸征剿大舉堵擊正在需兵安能責其忍飢禦侮今據前情合亟咨會為此備咨 貴部院請煩察照俯恤征兵祈卽檄令泉州府作速設法將正二月分糧米通勻散給以濟飢軍日食俾各兵知奮報効疆場有裨征剿非淺鮮也仍祈賜覆施行

康熙十九年二月十三日

會師搗巢咨水提

爲會師搗巢事本月十三日准

貴提督咨開爲照

逆鯨厚結海壇恃爲外固今海壇旣破先奪所恃福
興邊民可無寇害但賊鯨敗遯會鯨崇武并力堅防
則廈門勢必虛危本提督惟審風潮利便刻期進師
平海牽制崇武之賊貴將軍前咨曾示調集各港八
槳船隻若乘此時賊勢上危下虛徑先密遣精銳襲
渡廈門逆鯨必分力回顧本提督統率大鯨長驅殲
殲上下夾攻會期合舉根株立可盡淨此乘虛襲擊

攻取要機惟祈 貴將軍俯察力行共襄大舉以奏
蕩平也至圍頭要口最爲關係前咨屢請曾否調集
合再咨瀆等因到本將軍准此爲照海逆恃習波濤
拒命窮島接准 大咨已抵海壇賊艘敗遯諒應喪
膽自可長驅殲擊直取廈門矣今賊雖會踪崇武若
貴提督統率大艦臨之何慮并力堅防在本將軍於
未准 大咨之先已經面商 總督部院整棚士馬
刻卽親自統領并會合滿騎於沿海松嶼等處緊要
口岸調度堵擊逆賊外至於調集各港八槳船隻乘
勢密襲廈門本將軍所統陸路官兵多屬外省東豫
之衆向未嫻習舟楫况八槳船隻先經 督部院膳
有水兵早已委員專統知其自有調度至進據圍頭
多帶砲火攻打使逆艘上下不能停泊本將軍節次
移咨 同安鎮王 并屢飭防守東石竿頭各將并
會師合營進屯該地方夾擊專候 貴提督追勦南
下在案本將軍滅賊心切陸路機宜無不力行而水
路進剿尤祈 貴提督之詳察力行共勦大舉也今
准前因合就咨覆爲此合咨 貴提督請煩察照施

行

康熙十九年二月十五日

咨會出兵咨漳

州鎮浦

為咨會出兵日期事為照舟師已抵海壇則陸路官兵自當乘時夾擊茲本將軍會同督部院各親自

酌帶馬步官兵於本月十六日前往同安松嶼沿海一帶地方踏看形勢調度策應夾擊并稽察各營防剿官兵飭令用心預備合力進勦所有鳳山營盤業已議留福寧總鎮黃照舊堵守以備不虞外至於漳屬沿邊一帶地方尤祈貴鎮就近嚴飭各營官兵嚴加堵守以保萬全可也合就一并移知為此

平陽縣志 卷之八
合咨 貴鎮煩爲查照施行

康熙十九年二月十六日

緊急軍務咨督院

爲緊急軍務事本月十七日據洛陽營遊擊趙雲報
稱本月十四日奉 寧海將軍喇 軍令飛調卑職

帶兵三百名赴泉聽候 副都統吳 率領滿師調

遣夾勦卑職卽於十五日寅時帶兵自洛陽起行外
所有本汛已交浙江守備劉澤深本營守備李印防
守訖等情到本將軍據此爲照舟師已抵湄洲在陸
路官兵自當調撥分佈以備大舉夾擊但查洛陽一
汛爲衆郡之門戶現今逆艘聚泊於臭塗崇武一帶

誠恐狡謀早晚窺伺萬一乘該汛兵單豕突焚劫不特地方人民受害尤恐墮我軍聲似當仍令遊擊趙雲回守該汛以固邊防俟水師船隻到臭塗之日檄令該將帶兵南下夾勦尤爲慎重也緣要汛空虛鯁鯁過慮合就咨達爲此備咨 貴部院請煩察照祈卽咨商 寧海將軍仍令趙雲回守洛陽以固根本仍祈示覆施行

康熙十九年二月二十日

勦殺海逆咨督院

爲塘報勦殺海逆事爲照水師訂期於本年二月初六日出海咨會到本將軍隨卽會同 貴部院咨行各鎮營飛調陸路官兵先據圍頭要口安設大砲聲援夾擊令上下往來賊艘不得停泊以便水師官兵進取復於本月十五日會商 平南將軍賴 將漳州鳳山一帶營盤邊牆分留福寧黃總兵漳州吳總兵等帶領各營副叅遊守官兵照舊嚴加堵禦外 貴部院同本將軍於十六日各親帶馬步官兵自漳

州鳳山營盤起身本日到嶺後嶺地方安營隨探得有僞左虎衛何祐統領僞中衝鎮等十餘鎮大小賊船八十餘號約計賊衆四千餘預劄烏巽橋堡充龍堡金山一帶地方相聯屯營以拒我師南爲廈門屏蔽北爲崇武臭塗等灣各逆艘聲援且聞我同安港八槳船隻將出會同水師夾擊廈門希圖於此處堵禦先須發兵勦除破其犄角 貴部院與本將軍計議已定隨於十七日五鼓挑選精兵各親自統領於辰時到烏嶼一帶列陣詎逆賊分爲三股前來迎敵 貴部院同本將軍分遣貴標內中協副將蔣懋勛署右營叅將薛受益內中協右營遊擊王文魁後營叅將謝明德守備陳印奇千總王應龍把總應順甫等隨征總兵陳士愷副將康泰馮昭京侯晉爵等叅將秦守信韓瑞閻國柱等遊擊王大有南甫曹明等外委督陣都司張璽鄭有德守備章得勝戎旗遊擊盧楚佩功加守備韓琪領旗各官劉彪等帶領馬步官兵由中路進發本標中營叅將馬勝左營遊擊朱起龍援勦右營遊擊楊懋綬援勦左營中軍守備楊可

能千總楊會把總王豹等外委總理戎旗遊擊崔陞
都司高永福楊撰守備徐可成張貴千總王起龍楊
茂把總王貴成隨征副將王耀龍叅將會展雄遊擊
鄭鍾如都司倪俊等帶領馬步官兵由左路進發又
調撥灌口營叅將藍理江東左營遊擊鄭興同安鎮
標右營遊擊趙邦試千總林明等外委千總程鯉把
總湯泰投誠副將藍英等帶領官兵由右路進發我
兵三路奮勇齊進冲過潮溝自辰至午殺死逆賊甚
多尙有白礁等處賊兵千餘見我官兵殺敗賊衆突
出應援 貴部院親督委管統領護印八旗披甲筆
帖式樂敏外委驍騎校樊金榜張應隆龔玉堂王潤
子撥什庫劉德趙廷芳李之華斬有福閔得榮年文
燦劉首相并戎旗各材健等本將軍親督外委戎旗
都司張九龍守備羅成功等并各材健分爲兩翼飛
馬抄出逆賊陣後腹背夾擊賊遂大敗我兵盡力砍
殺共陣斬賊衆一千六百餘名活擒僞官七員活賊
一百八十七名連破賊營七座將賊堡盡行焚燬拆
平餘賊奔遯上船被我兵尾追急迫落水淹死不計

得獲賊船大小共九隻立即放火焚燒更得獲大旗
二十三面高招旗一十九面及盔甲器械藤牌等項
甚多至申時收兵回營據各營將領呈解陣擒偽官
兵俱經 貴部院驗明悉係長髮因對陣重傷垂斃
隨盡發沿邊梟示訖復據探兵報稱又有逆賊約有
二千五百餘人在海倉寨屯劄離營盤有三十里等
情 貴部院同本將軍於十八日復親帶各營官兵
前往撲剿賊衆見我兵勢大不敢出戰閉寨堅守放
炮擊打官兵我師初到銳氣正盛遂鼓舞勇攻擊扒上
寨城炮矢刀鎗一齊擊殺當斬逆賊一千二百餘名
賊衆披靡奔船其船上各賊不敢救應爭先開船逃
走又復落水淹死無數生擒偽官二員活賊三十二
名俱卽就該地方梟首外打沉賊大趕繒船一隻雙
篷船四隻得獲威遠大砲一位發煩砲二位高招旗
六桿大旗十八面戰被二十領并盔甲大刀長鎗藤
牌火箭等項甚多將寨牆着令兵丁立刻拆燬因天
晚收兵回營此兩戰也皆藉 貴部院之方畧各將
士之協心用命故能獲此全勝今沿海一帶地方自

烏嶼橋起至海倉松嶼止數十里之間數年盤踞賊巢盡皆掃蕩無遺賊已膽破魂消矣至於內閣中書揀選候補知府陳啓霖候補僉事道黃性震俱奉

貴部院差遣修砌橋梁道路與有勞績俱不可泯所有各營得獲高招大旗盔甲刀鎗大砲籐牌等項軍器查畧堪用者發交各營改用不堪者盡行焚燬更查各營共陣亡兵丁一十三名輕重陣傷官兵共七十一名俱經本將軍會同 貴部院分別賞銀殮埋并給賞醫藥各營共陣斃官馬二十七匹俟旋師之日聽其各自呈報開除外相應一併備叙塘報爲此備咨 貴部院煩請察照核明會疏題叙以鼓後効施行

康熙十九年二月二十日

會師擣巢咨水提

為會師擣巢事本月十九日准

貴提督咨開進師

平海牽制崇武之賊若乘此時賊勢上危下虛先密遣精銳襲渡廈門逆踪勢必分力回顧上下夾攻會師合舉根株立可盡淨至圍頭要口最為關係曾否調集備移在案未見咨覆茲師次平海日在相機前進但貴將軍何地集師何期合舉尤期迅發訂示以便協力撲勦等因到本將軍准此案准 貴提督咨前事業經本將軍備將夾剿機宜咨覆 貴提督在

案本將軍復會同 總督部院面商 平海將軍賴

將漳州鳳山一帶營盤邊墻分留 福寧總鎮黃

漳州總鎮吳 統領各營副叅遊守官兵照舊嚴

加堵禦外本將軍同 督部院各親統馬步官兵於

本月十六日自鳳山起身本日到龍嶼界外嶺後嶺

地方下營據探兵報稱有賊首何祐帶領偽鎮十餘

鎮賊衆四五千在於烏嶼橋充龍金山一帶相聯屯

營七座計圖一爲廈門屏蔽一爲崇武臭塗等灣各

逆艘聲援等因自應首先剷除遂經本將軍會同

督部院於十七日親帶馬步精兵分爲三路進兵大

獲全勝計陣斬活擒賊衆共一千七百復據探報海

滄有逆賊屯踞寨城十八日復各帶兵前往撲剿又

經斬獲千餘將逆賊所劄寨城俱已盡行焚毀拆平

今沿邊自烏嶼橋起至海滄松嶼止一帶賊巢向爲

逆寇盤踞者今皆掃蕩無遺現在會同 督部院相

機進取外此皆陸路賊營本將軍業經會師勦蕩至

於何地集師何期會舉專候 貴提督一破崇武等

灣迅發訂示便可協剿以收蕩平全效也今准前因

合并咨覆爲此合咨 貴提督請煩察照施行

康熙十九年二月二十一日

咨會遣發咨督院

爲咨會遣發官兵攻取廈門逆穴事爲照海澄旣復賊心離散本將軍復多方宣布

皇仁廣行招撫隨有僞鎮陳昌於二十六日午時差遣僞監紀叅議周天奇等前來納款隨經本將軍賞給花紅銀牌仍給照票遣其接引陳昌作速來歸已經咨會在案至本日酉時僞總兵陳昌率領所轄大小船隻百餘號官兵五千餘員名并移帶眷口到海澄城外登岸投見已經撫慰暫行安插外又有僞總兵吳

桂羅士鈐先遣僞通判葉光寰等前來投誠請領旗號并請發兵迎援隨遣援剿右營遊擊楊懋綬中軍叅將馬勝等帶兵迎援隨各帶官兵船隻眷口前來投誠本將軍卽令剃頭將伊眷口搬入前任水師提督施 衙門內安頓外據稱廈門兵民紛紛搖動亟宜乘時進兵攻取桂與士鈐願爲前部等情本將軍隨經遣發本標中軍叅將馬勝右營遊擊李璉各帶領官兵乘坐總兵吳桂羅士鈐帶來大船會同吳羅二總兵官兵并副將詹六奇林葵等官兵乘坐八槳船隻爲頭敵先進併令總兵陳昌所轄官兵立刻剃頭挑撥精銳乘坐原帶船隻爲二敵其 貴標將官三員本將軍現在諭令商議酌撥一員帶兵協同進取逆穴以絕根株外本應先期咨會然後發兵因事機貴速恐往返耽遲故一面遣發一面咨會尤祈 貴部院星速酌撥官兵隨後接引以收全效可也合就咨會爲此備咨 貴部院請煩察照施行

康熙十九年二月二十七日

再商保固咨兩院

爲再商保固巖疆之長策以豫消未萌事爲照鄭錦
鷗張窮島山寇乘機竊發遙爲響應致全閩騷動幾
成燎原幸藉

朝廷威福 貴部院訐謨海澄已復逆穴蕩平復荷會議
將水師派防廈門金門鎮海銅山海壇定海日湖潯
尾各島嶼將陸師派防平海崇武獺窟臭塗東石圍
頭各要口是水陸要汛星羅碁布沿邊可恃無恐矣
仍將新設之閩安蒜嶺鎮東興化泉州大小盈灌口

江東橋雲霄漳浦各營共裁去官兵九千三百名亦
可以仰承樽節之部議矣但本將軍愚見更有商者
攘外固不可不周安內亦不可不密年來兵燹頻仍
民間困苦已極鳩形鵠面觸目堪憐而沿海遷徙之
衆棄其田廬移入界內備極流離今雖會議展界准
回故土第昔日之產業荒廢一時不能生聚其投誠
弁兵原皆游手好閑之徒祇逼於兵威事勢不得不
投戈倖免今在伍者卽月有所給然軍興之餘米珠
薪桂恐有限之餉未必濟其衣食歸農者未必真皆
悔過自新肯安於耕鑿而議裁九千之衆亦原無素
業可以資生一旦糧餉議裁何以糊口若今日措置
得宜衣食有所自出則前項諸人漸次革心皆我循
良赤子倘安插不得其所撫綏一有未周則饑寒日
甚勢必異念復萌一遇警息則此種貧窶皆揭竿爲
亂之資也况崇山深谷之中奸狡隱伏以待釁觀變
者未必無人所藉 貴部院之弘猷長慮飭行各府
縣賢有司亟爲實心勞來稽察俾善懦得免飢寒狡
黠知所做惕則內外清肅反側消除閩南半壁從此

可以永安矣再查興化一郡原設鎮標三營城守一營共兵四千名因地當孔道前此兵力不敷分布故請設楓亭一營今將鎮標三營盡派防守海壇楓亭一營又撥防平海只餘城守一營恐不足以資彈壓并分防各縣汛或當再爲別加損益以收萬全尤祈貴部院之宏裁斟酌者也本將軍自念衰老行當懇切乞休似無庸復多置喙惟以

國恩深重目擊民情時勢又不敢以將退之身而遽爲緘默敢竭芻蕘以備鑒採倘荷俯賜裁酌亟爲區處或可少佐上慰

廟堂下奠黎庶也合就咨請爲此備咨貴部院察照酌奪仍祈示覆施行

康熙十九年三月初十日

咨明事咨督院

爲咨明事爲照逆島旣平石碼地方乃屬內地似毋庸重兵駐劄業經本將軍檄行漳州城守副將郭忠孝撥留將官一員帶兵五百名暫爲防守俟 水師提督萬 回師之日交明撥官接管其餘官兵着令該副將盡數帶回漳州仍令該副將將鳳山一帶各營盤原調安頓攻打逆賊大小紅衣發煩各砲位盡行擡運進城如係城上舊砲仍安頓原舊處所至獅子山沿河一帶各賊營得獲大小砲位數目俱經具

題報 部之物不便久頓外汛恐有奸民釘塞砲眼
并偷移別用之弊相應一併着令該副將擡運府城
查明收貯除併經檄行副將郭忠孝遵照外合就咨
明爲此備咨 貴部院請煩察照施行

康熙十九年三月十八日

飭勦內地咨五鎮

爲飭勦內地餘孽以安民生事照得閩省向因海逆
鼓亂凡各標協營官兵調征邊汛者多留防內地者
少未免兵力單薄致深山僻壤之間無賴宵小嘯聚
出沒或百千爲羣或夜屯曉散剽掠鄉村肆害殘黎
茲逆經敗遯島嶼蕩平現在會議於沿海各島灣要
口安設官兵巡防彈壓是海賊之患從此可以消除
至於各鎮營原調南征官兵已經盡行遣發回營則
各處兵力俱厚所當及時搜剿山寇以靖內奸除經

飭行各協營將領遵照搜捕外合移通飭爲此合咨
貴鎮煩爲查照希卽飭行所屬各協營將領着令會
同各該縣多差精細能幹兵役於所轄汛地之內密
行訪探如有前項亡命宵小潛伏巖谷或煽誘遷徙
窮民或窩藏逃回海寇結夥出沒竊劫害民者立卽
撥發官兵勦捕以盡根株至於投誠歸農僞官兵務
令各該縣安插得所取具地方鄰佑保結不時稽察
以杜反側目今大寇已平海疆旣靖凡一切竊劫盜
案部例處分甚嚴貴鎮有統轄之責所關綦重
尤祈勿惜情面嚴加督率務令地方肅清庶免代人
受過倘各營將領偷安玩寇悠忽疎防立卽指名揭
報以憑飛章叅處仍祈將嚴飭過緣由并取具各將
領遵依見覆查考施行

康熙十九年三月十九日

咨取功員咨五鎮

爲咨取功員履歷清冊達 部 題叙事本月十七

日准 總督部院姚 咨開照得逆孽盤踞海島歷

經多年本部院蕩平心切會同貴將軍統領水陸官
兵於本年二月二十三日克復陳州馬州灣腰樹觀
音山展旗寨豐門寨灣頭寨果堂寨太平寨石碼三
叉河玉洲等處一十九寨二十四日巳時恢復海澄
縣二十七日亥時恢復廈門金門各島俱經具疏

題報在案但在事大小人員積數載之辛勞獲連日之

奏凱功不可泯相應查取姓名履歷彙冊造送以憑
達部

題叙者也除檄行本標并各鎮營查造外合就咨達爲
此合咨貴將軍請煩察照希卽行令貴標將領并移
行各鎮營迅將陳州等一十九寨海澄廈門各案在
事有功人員照案開造履歷清冊彙送本部院以便
咨題叙功施行等因到本將軍准此擬合就移爲
此合咨貴鎮煩爲查照仍希轉行所屬各協營速
將克復陳洲等十九寨并恢復海澄縣廈門金門各
島在事有功人員照案分別開造履歷冊底着令經
識賚赴本將軍轅門以憑核明發造清冊咨送督
部院彙送內部

題叙希勿遲緩施行

康熙十九年三月二十日

借給糧餉咨撫院

爲咨請借給糧餉以濟兵食事爲照泉州米價騰貴業荷 貴部院遠恤殘黎嚴示勸諭而閉糴如故每石米價高擡至四兩三四錢不等日甚一日人心惶惶近本將軍班師回泉目擊心愴當卽出示告誡使平價發糴以蘇民困惟是本標五營併援勦各營兵丁月支米折盡付買米尚不敷十日之需爲念各兵久出征勦勞苦已極茲幸海逆初平暫回休息然餘孽尙未盡滅常游移於閩廣交界沿邊之地各兵猶

須披甲荷戈以期剿禦但米珠薪桂困苦之狀殊難
指述計惟有借出月餉就省買糴米石船運到泉散
給各兵庶兵丁既免枵腹之苦而泉郡亦無高擡米
價之重困也案據中軍叅將馬勝呈請借給四月分
糧餉銀兩隨經本將軍移咨 總督部院借給業荷
在漳給發矣今夏季五六兩月分本標五營并援勦
左右兩營應支官兵俸餉等銀請祈 貴部院照數
給借以便就近買米船運來泉給濟兵食本將軍本
擬措銀赴省買糴奈長途帶銀跋涉維艱尤祈 貴
部院俯恤窮兵廣開 弘慈不特三軍感激卽本將
軍感佩相成之誼匪淺鮮矣今據中軍叅將馬勝并
援勦左右營遊擊馬四玉楊懋綬等備具領狀前來
合就咨送爲此備咨 貴部院請煩察照給借仍祈
示覆施行

康熙十九年四月初一日

飛報事咨督院

爲飛報事本月十三日據署建寧副將張念祖報據
左營遊擊李英報據防守曹墩把總呂應龍報稱賊
首江機帶領羽黨約有數千突犯境內竹溪黎源屯
田守備吳應雄家又有王都翁住呂孔源黎源下洋
火燒橋等處徧聚搜山捉拿男婦勒糧索餉散創招
兵鄉民盡皆逃竄又有吳應雄下旗牌王甲帶領屯
丁三百餘人投入賊營江機遣發官頭暗來曹墩各
處招去原屯田遊擊程應榮名下屯丁同入夥黨又

有當日投誠人黃祚今招夥復投入賊營各鄉人民
攜老扶幼紛紛逃竄沿途號泣悽慘倍常等情本刻
又據興田塘兵宋國武報稱今興田地方并四處附
近鄉村百姓聞有逆賊現扎黎源下洋一帶欲來地
方打糧索餉男婦紛紛奔逃村無人烟等情各到職
據此竊照卑職駐防崇建二汛時以剿撫爲念前因
原投誠遊擊程應榮病故守備吳應雄被賊計殺約
有屯丁二三千不等俱係昔年投誠之輩恐其鷹眼
猶存二弁相繼而亡屯丁無主約束况江機賊營相

近恐生叵測之變故卑職英會商崇安金知縣親往
武彞宮傳集程吳下衆頭領再四面諭安慰各給委
牌令其嚴束屯丁毋使投入匪類業將委官姓名開
報在案今不期渠魁江機奸計百出暗勾屯丁入夥
如虎添翼不思區區山寇屢奉各憲招撫已經差員
賚繳印劄又奉

親王加授將軍爵位恩逾格外卽應出山歸誠矢心報
効毋負上恩乃反率黨移劄建陽竹溪地方布散黨
羽流突崇汎呂源黎源下洋各處鄉村搜山擄掠捉

人索餉今建陽新厝塘頭杜潭長坪一帶殘害無忌
且聲言我等奉 王劄不日赴省剃髮歸誠因乏路
費口糧故來告借等語以致汛防官兵恐悞各憲招
撫之意未便輕易進勦查得興田地方乃通衢官道
設有塘兵遞送公文居民懼賊驚逃倘賊漸至彼地
則羽書中斷關係匪輕又查得武彘山巖向有富民
避亂於彼山賊素所垂涎今江逆見我兵單必往劫
掠無疑伏乞憲臺迅發馬步官兵駐劄興田中道以
張聲勢仍乞迅撥官兵二三百名星赴曹墩協同把
總呂應龍相機進止庶地方不致塗炭春耕尚有可
望而

國課不致虧缺等情本日又據左營中軍守備程瑋報
稱三月二十九日據長坪塘兵何福等稟稱今有偽
兵俱在大路下建陽一帶地方搶擄人畜更在竹溪
招兵理合飛報等情各到職據此竊照賊衆借撫紛
紛出巢流突建境擄掠鄉村捉人索餉又招屯丁入
夥情形叵測且 宣武將軍官兵俱往邵武而建寧
兵單寥寥無幾除護餉解逃尙不敷差遣今據左營

將備塘報警息除一面立撥領旗丘光信等帶領馬
兵馳往建陽一帶哨探仍一面檄令中軍守備田毓
瑞撥發把總張瑞瑛帶領兵丁前往興田駐劄堵禦
外理合具報又爲飛報事據崇安縣呈稱該卑職查
得江機陽奉陰違肆行剽掠殺戮生靈招人入夥漫
山遍野橫行無忌崇邑斗大孤城將何堵禦伏乞憲
臺迅賜酌奪救民湯火以全巖邑卑職可勝翹首待
命等因各到將軍據此爲照山寇江機楊一豹狡言
就撫遲我官兵進勦今復招民同叛橫肆劫掠各處

屯丁復投入夥勢益鴟張致上游居民流離遠竄產
業拋荒先屢據各營將領具報逆賊突犯出沒情形
節經本將軍移咨 貴部院并嚴檄飛催該汛防將
弁作速協力進勦在案今復據該副將具報以逆賊
曾受 王劄加授將軍爵位聲言不日赴省剃髮因
乏路費故來告借等語以致官兵遲疑恐礙撫局不
敢進攻逆賊以就撫緩我兵機久不出降橫行劫擄
賊勢日漸滋蔓百姓日受荼毒若不亟爲剿滅則地
方受禍無有底止查各標營征勦官兵初班回汛自

應暫令休息但江楊二逆剽劫愈熾又未便聽其蔓延除經移咨福寧鎮挑選能將帶領精兵一千名飛赴崇陽地方會同各該營官兵星速進剿去後合就咨會爲此備咨 貴部院請煩察照仍祈會飭福寧鎮迅速遣發官兵前往掃蕩以靖山寇以安地方仍祈示覆施行

謹陳平海咨督院

爲謹陳平海善後十策永奠海疆事本年四月十四日准 貴部院咨開准 兵部咨前事內開查總督姚 條奏廈門等島沿海要地官兵防守俟荷蘭國船到日進滅海賊尅取臺灣會同廣東官兵剿滅海賊劉國軒沿海仍舊展界新增綠旗官兵陸續漸撤浙江調來官兵應行撤回投誠官兵給與俸餉等情關係最要應與總督姚 將軍管提督楊 巡撫吳 水師提督萬 勅令會同將每件一一確議速奏

再議俟

命下之日將總督姚 條奏八款俱錄出發與總督將軍
巡撫提督可也等因於康熙十九年三月二十二日
具奏於本日奉

旨依議速行欽此欽遵抄出到部移咨到部院准此所有
原疏合就抄送爲此合咨貴將軍請煩察照酌議示
覆會 題施行計抄疏一摺等因到將軍准此爲照
逆孽鄭經與渠魁劉國軒等負固窮島擾害邊陲茲
仰邀

朝廷洪福 貴部院訂謨逆賊敗竄島嶼肅清 貴部院
懲前愆後條列良策入

告務期永奠海疆 內部咨移確議又荷 貴部院俯賜
咨詢管見所及敢不備陳一廈門金門並宜固守查
廈門昔年爲我師取而復棄後逆賊卽踞爲巢穴前
進剿時本將軍親至其地審察形勢是厦金之不可
不駐重兵固守誠有如 貴部院所策者至其間兵
數多寡船隻派設駐防或提或鎮本將軍職司陸路
是在 貴部院與 撫部院 水師提督斟酌盡善

者也一內地官兵移駐沿海要汛如閩安鎮兵三千名出守定海灌口兵二千名出守潯尾高埔以爲廈門犄角尤無遺議矣查興化原係府城又屬全省往來咽喉孔道原設鎮標三營城守一營共兵四千名前緣兵力不敷分布故請添設楓亭一營今將鎮標三營盡移防海壇楓亭一營又撥防平海只留城守一營不足以資彈壓况差使餉鞘護送絡繹何以四應仙遊一縣又山海交錯奸宄時常竄匿似興化一郡當駐重兵以備不虞至惠安兵一千名出守崇武

惠安地當冲路所轄塗嶺又爲四通之道若巡緝防範護送差鞘無兵可恃恐滋不測查水師提督請設兵一千自獺窟轄至崇武則惠安營官兵似當酌留以保固城汛分防塗嶺也一遣發舟師會合水陸官兵先勦粵寇以絕滋蔓一俟荷蘭船隻進攻臺灣以靖根株其次第乘勝進取以掃積年之逋寇登沿海數千百萬生靈於衽席者實爲目今要着但本將軍於海道未諳不敢輕議一開還邊界以上裕國課下濟民生誠爲利益但今賊首雖遜餘孽尚未盡

滅茲邊界旣展延袤數千里賊踪處處可以登犯奸民在在可以勾通卽水師提督能節節設備沿邊似可無患萬一海逆擁衆乘潮順風合踪而至水師或不及堵截內地兵卑顧此失彼不特村鎮遭其荼毒并恐城池有警人心風鶴是目前之展界固屬便利內汛之分防尤當佈置周密方可無虞也一裁撤新增官兵查閩安興化泉州大小盈江東等處官兵皆久用命於砲矢鋒鏑之間今海逆初平一旦卽議裁撤分防更爲不周內地益見單弱况驟裁萬數之

兵此輩不習耕種不善經營赤貧無措勢必相率爲盜是海寇尙有遺孽內地復啓亂萌矣在管見以裁汰之兵不必定限於四五月之內止就其中果屬衰弱者汰之不補強壯者仍留且暫令沿邊分守以固我疆圉一先撤浙兵以省錢糧糜費洵爲至當不易者矣一投誠官兵請給糧餉查閩省投誠之衆爲數甚多豈盡傾心向化不過迫於兵威事勢俛首求生儘有歸農之衆面革心非尙煩吾之顧慮其在隨標入伍者又皆勇悍不安耕作之人資身無策僅藉

月餉存濟苟不爲贍給必至復循故轍是尤在 貴
部院力爲主持請給糧餉以安其心者也總之閩省
地方山海環峙鞏固要策必須水陸相維山海互防
蓋

朝廷正供錢糧百姓地畝廬舍皆在於陸不在於水更城
池倉庫之重餉鞘差使之繁又多在陸路內地則駐
防之兵未可盡移於沿海况邊界旣展奸民無地不
可出入賊艘無處不可登犯倘深山窮谷之中又有
鴟聚流突海逆復肆勾連水陸交訐如昔年紀朝佐
鄭不伐廖瑄等可爲前鑒若再有變起倉卒卽發兵
星馳撲勦亦恐鞭長莫及目今 王爺大兵將次旋
師浙兵業已先回兼之遷界流民尙未復業投誠兵
衆未盡革心劉國軒見在粵東招集舊賊聯絡巨盜
以乘我隙是陸路防維正當嚴謹之日若遽裁一萬
之衆防範不周種種可虞度時量勢宜俟夾剿逆孽
劉國軒殲滅之後次第裁撤則

國計民生兩有攸賴矣未議如此是否有當統祈 貴
部院鴻謨再加確裁今准前因合就咨覆爲此備咨

貴部院請煩察照主稿 題覆并祈示覆施行

康熙十九年四月二十日

咨商事咨督院

為咨商事為照泉州米價騰貴兵民交困本將軍回泉時目擊心愴隨即移咨 撫部院將本標五營併

援剿兩營官兵應支五六兩月餉銀一萬七千餘兩差中營守備丁世芳就省採買糧米撥船海運到泉除給兵食之外其餘盡行照依省價發糶窮民接濟時艱業經咨明在案但往返買糶耽延迄今尚未能到而泉郡米價日甚一日每石竟至五兩餘目下兵困民饑人心惶惶顛連困苦觸目傷心大可畏懼案

准 大咨倡捐銀一萬四千兩買米七千餘石先運
至泉聞該府縣將此項米石撥給滿洲致民間未沾
寔惠米價日長若不亟爲設法接濟恐至五六月來
勢必湧至七八兩本將軍見此兵民嗷嗷憂心如焚
寢食俱廢茲聞漳州各邑米價比泉州地方稍平擬
欲措銀數千兩差員前往龍溪南靖一帶採買糧米
船運來泉卽照漳州所買原價照數平發兵食以救
目下五六兩月青黃不接之艱俟至七月早稻收成
便可無慮本將軍爲地方兵民起見愚意若此如屬
可行統祈 貴部院酌奪示覆以便專差的員星赴
採買尤祈 洪慈於投誠船隻之內酌撥十數隻借
用其中或有滲漏併請着令府縣修艙堅固以便差
員裝運糧米來泉仍請移咨 水師提督轉行各汛
驗明放行 貴部院軫念兵民無所不至今地方饑
困若此本將軍目擊急切情形敢不咨請以解刻下
兵民重困合亟咨商爲此備咨 貴部院請煩察照
迅賜示覆施行

康熙十九年四月二十六日



